



TOSHKENT DAVLAT YURIDIK UNIVERSITETI REKTORINING B U Y R U G ' I

15.02.2023

32-um-son

Toshkent davlat yuridik universitetida korrupsiyaga qarshi tizimini yanada takomillashtirish to'g'risida

O'zbekiston Respublikasi Prezidentining 2020-yil 29-apreldagi "O'zbekiston Respublikasida yuridik ta'lim va fanni tubdan takomillashtirish bo'yicha qo'shimcha chora-tadbirlar to'g'risida"gi PF-5987-son Farmon talablarini ijro etish hamda universitet faoliyatiga ISO 37001 - Korrupsiyaga qarshi kurashish tizimi xalqaro standartini joriy etish maqsadida

BUYURAMAN:

1. ISO 37001 — Korrupsiyaga qarshi kurashish tizimi xalqaro standartining 7.3-bandiga muvofiq har bir tashkilot o'z xodimlariga korrupsiyaga qarshi kurashish mavzusi yuzasidan yetarli ma'lumotlarni yetkazish, o'qitishni tashkil qilish lozimligi ma'lumot uchun qabul qilinsin.

2. Universitet Korrupsiya qarshi ichki nazorat bo'limi (E.Xosilov), Jinoyat huquqi, kriminologiya va korrupsiyaga qarshi kurashish kafedrasi (K.Xakimov), Kadrlar bo'limi (S.Mamanazarov), O'quv-uslubiy boshqarma (Registrator ofisi) (S.Bozarov) Universitetning asosiy shtatdagi professor-o'qituvchilari hamda xodimlarini korrupsiyaga qarshi kurashish milliy qonunchilik, ISO 37001 — Korrupsiyaga qarshi kurashish tizimi xalqaro standarti hamda Universitetning ichki hujjatlari talablari yuzasidan joriy yilning fevral oyida savol-javoblar tayyorlanishi hamda elektron tarzda test o'tkazilishini ta'minlasin.

3. Toshkent davlat yuridik universiteti Korrupsiya qarshi ichki nazorat bo'limi to'g'risida Nizom ilovaga muvofiq tasdiqlansin.

4. Universitetda korrupsiyaga qarshi kurashish tizimi ISO 37001 — Korrupsiyaga qarshi kurashish tizimi xalqaro standartiga universitetning mos kelishini ta'minlash maqsadida Universitet Korrupsiyaga qarshi ichki nazorat bo'limi O'zbekiston Respublikasi Adliya vazirligi tomonidan BMT Taraqqiyot Dasturining "O'zbekistonda samarali, hisob beruvchi va shaffof boshqaruv institutlari orqali korrupsiyaga qarshi kurashish" loyihasi doirasida jalb

qilingan “Alfakon Systems” MCHJ ekspertlari hamkorligida 2023-yilning 20–23-fevral kunlari ichki audit o‘tkazsin.

5. Kadrlar bo‘limi (S.Mamanazarov), Tashkiliy-nazorat va strategik rejalashtirish boshqarmasi (D.Mahkamov) kompleks tekshiruvga amaliy yordam ko‘rsatilishini ta‘minlasin.

6. Mazkur buyruqning bajarilishini nazorat qilishni o‘z zimmanda qoldiraman.

Rektor v.v.b.



I.RUSTAMBEKOV

Toshkent shahar

Kiritildi:

Bo'lim boshlig'i

E.XOSILOV



Kelishildi:

Boshqarma boshlig'i

D.MAXKAMOV



Boshqarma boshlig'i

S.BOZAROV



yuriskonsult

D.ALIBOYEV



Bosh mutaxassis

D.ABDULLAYEV



**Toshkent davlat yuridik universiteti Korrupsiyaga karshi ichki nazorat
bo'limi to'g'risida**

NIZOM

1-bob. Umumiy qoidalar

1. Mazkur Nizom Toshkent davlat yuridik universitetida (keyingi o'rinlarda – Universitet) korrupsiyaga karshi ichki nazorat bo'limining (keyingi o'rinlarda – Bo'lim) maqsadi, vazifalari, funksiyalari, huquq va majburiyatlarini belgilab beradi. Bo'lim Universitetning mustaqil tuzilmasi hisoblanadi.

2. Bo'lim o'z faoliyatida O'zbekiston Respublikasining Konstitutsiyasi va qonunlariga, O'zbekiston Respublikasi Oliy Majlisi palatalarining qarorlariga, O'zbekiston Respublikasi Prezidentining farmonlari, qarorlariga, Vazirlar Mahkamasining qarorlariga, shuningdek boshqa normativ-huquqiy hujjatlarga, Universitet rahbari va boshqaruv organlarining qarorlari, buyruqlari va farmoyishlariga, shuningdek ushbu Nizomga amal qiladi.

3. Bo'lim Universitetda korrupsiya holatlarini barvaqt aniqlash va oldini olish, ularning sabab va shart-sharoitlarini bartaraf etish, manfaatlar to'qnashuviga yo'l qo'ymaslik hamda korrupsiyaga nisbatan muvofiqlik munosabatni shakllantirish choralari ko'rishga mas'ul hisoblanadi.

2-bob. Bo'lim faoliyatini tashkil etish

4. Bo'lim to'g'ridan-to'g'ri Universitet rektoriga bo'ysunadi. Bo'limni boshqarish bo'lim boshlig'i tomonidan amalga oshiriladi.

5. Bo'lim boshlig'i Universitet tomonidan O'zbekiston Respublikasi Korrupsiyaga qarshi kurashish agentligi (keyingi o'rinlarda – Agentlik) bilan birgalikda o'tkaziladigan ochiq tanlov asosida Adliya vazirligi bilan kelishilgan holda ishga qabul qilinadi.

6. Bo'lim boshlig'ini lavozimidan ozod etish masalasi Agentlik va Adliya vazirligi bilan kelishiladi.

Bunda, Agentlikka bo'lim boshlig'ini lavozimidan ozod etish haqidagi Universitet rektorining taqdimnomasi beriladi.

Ushbu taqdimnomada xodimni lavozimidan ozod etish sabablari, motivlari ko'rsatiladi. Taqdimnomaga xodimni lavozimidan ozod etish sabablari va motivlarini tasdiqlovchi hujjatlar (masalan, xodimning arizasi, ichki mehnat tartibi qoidalarini buzganligini ko'rsatuvchi ma'lumotlar va boshqa shu kabi hujjatlar) ilova qilinadi.

7. Bo‘limda bo‘lim boshlig‘i va bosh mutaxassis faoliyat yuritadi.

3-bob. Bo‘limning asosiy maqsadi, vazifa va funksiyalari

8. Bo‘limning asosiy maqsadi universitetda, shuningdek, uning tarkibiy bo‘linmalarida korrupsiyaga qarshi kurash bo‘yicha ISO37001:2016 xalqaro standarti talablariga javob beruvchi kompleks tizimni, xususan, korrupsiyaga qarshi kurashish tizimini joriy etish va rivojlantirish, korrupsiyaviy holatlarni barvaqt aniqlash va ularning sabab va shart-sharoitlarini bartaraf etish, korrupsiyaviy xatti-harakatlar sodir etilishining oldini olish, universitet xodimlarida korrupsiyaga nisbatan murosasiz munosabatni shakllantirish maqsadida ularning huquqiy ongi va madaniyatini oshirish, universitetda korrupsiyaga qarshi profilaktik chora-tadbirlarni tashkil etish, korrupsiyaga qarshi kurashish sohasidagi hujjatlar ijrosini ta’minlashdan iborat.

9. Quyidagilar bo‘limning asosiy vazifalari hisoblanadi:

Universitetning korrupsiyaga qarshi kurashish bo‘yicha faoliyatini takomillashtirish;

Universitetda korrupsiyaga oid huquqbuzarliklarni profilaktika qilish va ularga qarshi kurashish;

Universitetda korrupsiyaga qarshi kurashish tizimining samarali ishlashini ta’minlash va nazorat qilish;

korrupsiyaga qarshi kurashish bo‘yicha faoliyatni amalga oshiruvchi hamda unda ishtirok etuvchi boshqa davlat organlari va tashkilotlari bilan hamkorlikni olib borish.

10. Bo‘lim o‘ziga yuklatilgan vazifalarga muvofiq quyidagi funksiyalarni amalga oshiradi:

a) Universitetning korrupsiyaga qarshi kurashish bo‘yicha faoliyatini takomillashtirish sohasida:

Universitet tizimida korrupsiyaga qarshi kurashish bo‘yicha chora-tadbirlarni amalga oshirishga qaratilgan ichki normativ hujjatlar loyihalarini ishlab chiqadi;

Universitetning korrupsiyaga qarshi kurashish bo‘yicha chora-tadbirlarini ishlab chiqadi va tasdiqlash uchun Universitet rektoriga kiritadi;

Universitetning faoliyatiga oid normativ-huquqiy hujjatlar va ichki normativ hujjatlarda aniqlangan korrupsiyaviy normalarni bartaraf qilish bo‘yicha takliflarni ishlab chiqadi;

Universitet tomonidan ishlab chiqiladigan korrupsiyaga qarshi kurashish bo‘yicha chora-tadbirlar loyihalarini Universitetda korrupsiyaga qarshi kurashish siyosatiga mosligi, maqbulligi va dolzarbligi nuqtayi nazaridan baholaydi va xulosalar beradi;

Universitetda korrupsiyaga qarshi kurashish faoliyatini yanada samarali tashkil etish va takomillashtirishga qaratilgan aniq takliflarni Agentlikka kiritib boradi.

b) Universitetda korrupsiyaga oid huquqbuzarliklarni profilaktika qilish va ularga qarshi kurashish sohasida:

Universitetda korrupsiyaviy xavf-xatarlarni baholaydi, ularning natijalari bo'yicha aniqlangan xavf-xatarlarni kamaytirish yuzasidan chora-tadbirlar rejalarini ishlab chiqadi va Universitetda korrupsiyaviy xavf-xatari yuqori bo'lgan lavozimlar ro'yxatini yaratadi;

Universitet tomonidan o'xshash huquqbuzarliklar sodir etilishi ehtimolini baholash maqsadida boshqa oliy ta'lim muassasalarida korrupsiyaviy huquqbuzarliklar sodir etilishining holati va yo'nalishlari haqida ma'lumot to'playdi;

maxsus axborot aloqa kanallari orqali Universitet xodimlari tomonidan korrupsiyaviy xavf-xatarlar va huquqbuzarliklar haqida kelib tushadigan murojaatlarni tahlil qiladi va ularni belgilangan tartibda ko'rib chiqilishini ta'minlaydi;

Universitetda yuritiladigan xizmat tekshiruvlari reestri yoki o'tkazilgan xizmat tekshiruvlarini ro'yxatga oladigan boshqa tegishli hujjatda korrupsiya faktlariga doir xizmat tekshiruvlari bo'yicha ma'lumotlarning to'g'ri va to'liq aks ettirib borilishini nazorat qiladi;

davlat xaridlarini amalga oshirishda manfaatlar to'qnashuvini tahlil qilishda va Universitet bilan shartnomaviy munosabatlarga (mehnat munosabatlari bundan mustasno) kirishgan har qanday yuridik yoki jismoniy shaxslarning ishonchliligini tekshirish jarayonida ishtirok etadi;

Universitet xodimlariga korrupsiyaga qarshi kurashish masalalari bo'yicha tushuntirish va tavsiyalar beradi;

korrupsiya faktlari haqida xabar berishga mo'ljallangan maxsus axborot aloqa kanallarining faoliyat natijalarini tahlil qiladi va tahliliy materiallarni Universitet xodimlariga yetkazadi;

Universitet faoliyatidagi korrupsiyaviy holatlarni va xavf-xatarlarni aniqlash maqsadida aholi va xodimlar orasida so'rovlar o'tkazadi;

korrupsiyaga qarshi kurashishga oid talab va normalarning buzilishi masalalari bo'yicha intizomiy javobgarlikka tortilayotgan shaxslarga jazo choralarining mutanosibli va yetarliligini nazorat qiladi;

korrupsiyaga qarshi kurashish tizimini yanada takomillashtirish maqsadida Universitetda korrupsiya faktlari yuzasidan o'tkazilgan xizmat tekshiruvlari natijalari haqidagi ma'lumotlarni tahlil qiladi;

har chorakda va Universitet rektori talabiga ko'ra Universitetda korrupsiyaga qarshi kurashish bo'yicha amalga oshirilgan ishlar hamda ulardagi korrupsiyaviy holat haqida Universitet rektoriga ma'lumot kiritib boradi;

v) Universitetda korrupsiyaga qarshi kurashish tizimini samarali ishlashini ta'minlash va nazorat qilish sohasida:

korrupsiyaga qarshi kurashish bo'yicha davlat dasturlarida Universitetga yuklatilgan vazifalar ijrosini monitoring qiladi va nazoratini amalga oshiradi;

Universitetda korrupsiyaga qarshi kurashish tizimining ISO37001:2016 Korrupsiyaga qarshi xalqaro standarti talablariga mosligini ta'minlaydi;

Universitet xodimlarining malakasini oshirish bo'yicha o'quv rejalarining korrupsiyaga qarshi normalarga oid qismini ishlab chiqishda ishtirok etadi;

Universitet xodimlari, shu jumladan korrupsiyaviy xavf-xatari yuqori bo'lgan lavozimlardagi xodimlar uchun korrupsiyani oldini olish bo'yicha o'quv materiallarini ishlab chiqadi;

o'quv rejaga muvofiq Universitetning barcha xodimlari uchun korrupsiyaga qarshi kurashish bo'yicha treninglarning o'tkazilishini hamda ularda xodimlarning ishtirok etishini nazorat qiladi;

Universitet xodimlari va fuqarolar o'rtasida korrupsiyaga qarshi kurashish bo'yicha targ'ibot tadbirlarida ishtirok etadi;

Universitetning rasmiy veb-saytidagi "Korrupsiyaga qarshi kurashish" bo'limi hamda ijtimoiy tarmoqlaridagi sahifalariga joylashtirilgan ma'lumotlarni yangilanib borilishini ta'minlaydi;

Universitet xodimlari tomonidan korrupsiyaga qarshi kurashish sohasidagi O'zbekiston Respublikasining qonunchiligiga va Universitetning korrupsiyani oldini olish va unga qarshi kurashish bo'yicha ichki hujjatlariga rioya qilinishini monitoring va nazorat qiladi;

Universitetdagi korrupsiyaviy xatti-harakatlar bo'yicha xizmat tekshiruvlarini o'tkazish tashabbusini ilgari suradi va unda ishtirok etadi;

odob-axloq komissiyasi tomonidan manfaatlar to'qnashuvini tartibga solish bo'yicha qabul qilingan qarorlarning xolisligi va maqbulligini tekshiradi;

amalga oshirilgan monitoring, xizmat tekshiruvlari va nazorat tadbirlari natijalari bo'yicha korrupsiyaga qarshi kurashish tizimini takomillashtirish yuzasidan tavsiyalar ishlab chiqadi;

Universitetdagi korrupsiyaga qarshi kurashishga mas'ul tuzilma (shaxs)lar bilan hamkorlikda korrupsiyaga qarshi kurashish bo'yicha ishlarni tashkil etish va xodimlarning huquqiy savodxonligini oshirishga qaratilgan konferensiyalar, uchrashuvlar, seminarlar, tanlovlar va boshqa tadbirlarni tashkil etadi;

Universitet faoliyati uning korrupsiyaga qarshi kurashish bo'yicha ichki hujjatlariga hamda xalqaro standartlarga muvofiqligi yuzasidan tekshiruvlar o'tkazadi;

g) korrupsiyaga qarshi kurashish bo'yicha faoliyatni amalga oshiruvchi hamda unda ishtirok etuvchi boshqa davlat organlari va tashkilotlari bilan hamkorlikni olib borish sohasida:

aholining huquqiy ongi va huquqiy madaniyatini yuksaltirishga, jamiyatda korrupsiyaga nisbatan murosasiz munosabatni shakllantirishga doir chora-tadbirlarning ishlab chiqilishida ishtirok etadi;

qonunchilik hujjatlari bilan Universitet zimmasiga yuklatilgan korrupsiyaga qarshi kurashish bo'yicha vazifalarga muvofiq xorijiy davlatlarning vakolatli organlariga zarur axborotni taqdim etish to'g'risida so'rovlar yuboradi va ularning so'rovlariga javob berishda ishtirok etadi;

Universitetning korrupsiyaga qarshi kurashish chora-tadbirlarini takomillashtirish yuzasidan xorijiy mutaxassislarni jalb etish bo'yicha takliflar ishlab chiqadi;

korrupsiyaviy xatti-harakatlarni bartaraf qilish yoki korrupsiyaviy jinoyatlarni tergov qilish bo'yicha tadbirlarni amalga oshirishda huquqni muhofaza qiluvchi organlar bilan hamkorlik qiladi.

Bo‘lim qonunchilik hujjatlariga muvofiq boshqa funksiyalarni ham amalga oshiradi.

11. Bo‘lim xodimlariga ushbu Nizom va boshqa qonunchilik hujjatlarida nazarda tutilmagan funksiyalarning yuklatilishiga yo‘l qo‘yilmaydi.

4-bob. Bo‘limning huquq va majburiyatlari

12. Bo‘lim o‘z zimmasiga yuklatilgan vazifalar va funksiyalarni bajarish uchun quyidagi huquqlarga ega:

Universitet xodimlaridan ularning vakolatiga kiruvchi masalalar yuzasidan tahliliy materiallarni, xulosalarni, statistik va boshqa ma’lumotlarni olish;

xizmat majburiyatlarini bajarish doirasida Universitet xodimlaridan zarur yordam so‘rash va olish;

Universitet xodimlari faoliyatida aniqlangan korrupsiyaviy huquqbuzarliklar yuzasidan xizmat tekshiruvlarini o‘tkazish;

Universitet rahbariyatiga korrupsiyaga qarshi kurashish tizimini takomillashtirish bo‘yicha takliflar kiritish;

o‘z faoliyati doirasida Universitetga yozma ko‘rsatmalar, topshiriq xatlari va tavsiyalar berish;

Universitetning korrupsiyaga oid va boshqa majlislarida ishtirok etish;

tekshiruvlar o‘tkazish, hujjatlarni talab qilish, xodimlardan yozma tushuntirishlar olish;

Universitetning barcha turdagi aloqa va xizmat avtotransport vositalaridan foydalanish.

Bo‘lim qonunchilik va ichki normativ hujjatlarga muvofiq boshqa huquqlarga ham ega bo‘lishi mumkin.

13. Bo‘lim o‘z zimmasiga yuklatilgan vazifalar va funksiyalarni bajarish uchun quyidagi majburiyatlarga ega:

ushbu Nizom va boshqa qonunchilik hujjatlari bilan yuklatilgan funksiyalarni zarur darajada va samarali bajarish;

qonunchilik hujjatlari talablariga qat’iy rioya qilish va o‘z vakolat doirasidan chetga chiqmaslik;

Universitetda jinoyat alomatlari, xususan korrupsiya holatlari aniqlanganligi to‘g‘risida zudlik bilan to‘g‘ridan-to‘g‘ri yuqori turuvchi organ, Agentlik va boshqa huquqni muhofaza qiluvchi organlarga xabar berish;

Universitetning korrupsiyaga qarshi kurashish siyosati, odob-axloq qoidalarining korrupsiyaga oid qismining buzilganligi fakti yuzasidan Universitet rektoriga ma’lumotnomalar kiritish;

har chorakda, keyingi chorak birinchi oyining birinchi o‘n kunligida korrupsiyaga qarshi kurashish borasida amalga oshirilgan ishlar va chora-tadbirlar to‘g‘risidagi choraklik hisobotni Agentlikka taqdim etish.

Bo‘lim qonunchilik va ichki normativ hujjatlarga muvofiq boshqa majburiyatlarga ham ega bo‘lishi mumkin.

14. Bo‘lim xodimlari korrupsiyaga qarshi kurashish sohasida faoliyat yurituvchi xodimlarga mo‘ljallangan o‘quv kurslari yoki maxsus seminar-treninglarda ishtirok etadi.

15. Bo‘lim faoliyatining natijadorligi Universitetda korrupsiyaga qarshi kurashish tizimining samaradorlik va maqsadli ko‘rsatkichlariga erishish natijalariga asosan baholanadi.

Bo‘lim faoliyatining maqsadli ko‘rsatkichlari Universitet rektori tomonidan tasdiqlanadi.

Bo‘lim faoliyati samaradorligining maqsadli ko‘rsatkichlariga erishish ustidan nazorat Agentlik tomonidan amalga oshiriladi.

5-bob. Yakuniy qoidalar

16. Bo‘limni qayta tashkil etish va tugatish qonunchilik hujjatlarida belgilangan tartibda amalga oshiriladi.

17. Ushbu Nizom talablarini buzganlikda aybdor deb topilgan shaxslar qonunchilikda belgilangan tartibda javobgar bo‘ladi.